



LITURGI

Minggu Prapaskah 6 GKJ Sukoharjo

Minggu, 29 Maret 2026

Jagat Raya Nandhang Prihatos

PERSIAPAN

- *Pamaosing pawarta pasamuwan (M1)*
- PS, Pradataning Pasamuwan, soho perwakilan pasamuwan samekto diri wonten pelataran ngajeng gereja klayan ngasto ron palem

TIMBALAN PANGIBADAH

(lenggah)

PL: Dinten punika kita sami mèngeti tindakipun Gusti Yésus dhateng Yérusalèm. Cariyos ing Matéus 21:7-9 mekaten:

Kuldiné karo beloné digawa, banjur dilarabi sandhangané. Gusti tumuli nitih. Wong-wong kang gunggungé akèh banget iku padha njèrèng panganggoné ana ing dalan, ana manèh kang padha mecoki pang-panging wit-witan, padha disebar ana ing dalan. Lan wong akèh kang padha lumaku ana ing ngarsané Gusti Yésus lan kang lumaku ana ing sawingkingé padha nguwuh-uwuh pangucapé:

U: **“Hosana / konjuk ing Putranipun Prabu Dawud, / binerkahana ingkang rawuh / awit saking Asmaning Pangéran. / Hosana wonten ing ngaluhur.”**

PL: Mangga kita mahargya rawuhipun sinambi ngresepi lelampahan ingkang milujengaken kita, kados kapratéla ing Kitab Nabi Zakaria 9:9. Hé putri Sion, surak-suraka kang sora;

U: **hé putri Yérusalèm, giyak-giyaka!**

PL: Lah ratunira ngrawuhi sira; Panjenengané iku adil sarta unggul,

U: **lembah panggalihé, / nitih kuldi, / belo anaking kuldi momotan.**

- *umat jumeneng lan ngrepèkaken KPJ 33:1-2 sinambi ngayun-ayunaken ron palem*

KPJ 33. SWAWI TA KANCA KULA

- 1) Swawi ta kanca kula sami memuji Allah ing dinten puniki; kula dipun paringi bingah linuwih, bingah linuwih

▪ *Para Pelados Pangibadah lumebet ing papan pangibadah*

- 2) Asurak-surak, kanca, sami asuka-suka;
manganggé kang saé, sampun kirang sekaré
kang éndah-éndah, kang éndah-éndah

Votum

(jumeneng)

PS: Pitulungan kita ingkang sejati ingih punika saking Gusti Allah ingkang nitahaken langit, bumi dalah saisinipun, lan ingkang tansah maringaken sih-susetyanipun ngantos ing salami-laminipun. Amin.

U: **Amin...Amin... Amin**

Salam

PS: Salam tentrem rahayu tumraha ing para sedhèrèk sedaya. Gusti Yésus wonten ing panjenengan.

U: **Lan wonten ing panjenengan ugi!**

Pambuka

(lenggah)

PL: Para sedhèrèk, dinten punika kita sami mèngeti lelampahan sugeng lan pakarnipun Gusti Yésus ing Minggu Palmarum lan Minggu Sengsara. Lelampahan cacah kalih punika saged dipun tingali sami déné wonten sesambetanipun temah saged nyatunggil. Minggu Palmarum ngundhangaken grengsening kabingahan ing salebeting mahargya Gusti Yésus ingkang lumebet ing kitha Yérusalèm. Ing liturgi punika kita raos-raosaken srana ngginakaken ron palem ingkang kaayun-ayunaken, Minggu Sengsara, ngémutaken bilih ing minggu-minggu salajengipun kasangsaran tuwin kasangsaran wiwit dipun alami déning Gusti Yésus, ngantos pungkasanipun dumugi ing sédanipun inggih ing kajeng salib. Sedaya punika kalampahan awit kasetyanipun Gusti dhumateng ingkang Rama. Sumangga kita resepi: Gusti Yésus sampun paring patuladhan ing kasetyan, kados pundi tumrapping kita?

KPJ 231. KADOSPUNDI, DHUH GUSTI

- 1) Kadospundi, dhuh Gusti, nggèn kula sung urmat,
methukken klayan puji mring Ratuning jagad
Mugi Gusti madhangi lantaran Roh Suci
Salam kula ndadosna kepareng Paduka.

- 2) Saking dhampar kang mulya lan kluhuran swarga Gusti tedhak ing donya nunggil lan pra-jalma, tumut nandhang sangsara, ngrembat kasisahan, ngrukunken tiyang dosa dhumateng Pangéran.

Pengakening Dosa

- PL: Mboten sedaya ingkang sami mahargya punika setya. Nalika Gusti Yésus karangkèt lan dipun adili, tiyang-tiyang punika sami malik grémbyang lan nguwuh, “Barabas kaluwarna, Kasaliba Yésus.” Punapa kados mekaten ugi kasetyan kita? Dinten punika kita memuji Panjenenganipun, lan dinten sanèsipun kita lampah cidra dhateng Panjenenganipun. Sumangga kita titi gesang kita. Punapa kita sampun setya dhumateng Panjenenganipun?
- *umat kaparingan wekdal niti gesangipun ingkang mboten setya dhumateng Gusti, kairing instrumèn musik (lelagon tanpa nyanyian) lirik;*
 - *Pelados Sabda ndedonga*

KPJ 44. AKU WONG KANG DOSA

- 1) Aku wong kang dosa, ngungsi maring Gusti, temahan dèn sucèkna, srana rahé kang suci.
Reff.: Sang Kristus Gusti, Penebus yekti.
Nadyan dosaku agung, nging Gusti wus nglebur

- 2) Dhuh Gusti Pamarta, mung kwasa Paduka ingkang saged ngluwari kawula saking dosa.
Reff.: ...

Pawartosing Sih Rahmat

(*jumeneng*)

- PL: Mangka sanyatané lelara kita kang disanggi lan kasangsaran kita kang dirembat, éwasamono kita padha ngira Panjenengaé iku kena ing ipat-ipat, kagebag tuwin katindhès déning Gusti Allah. Mangka Panjenengané iku sinudukan marga saka anggon kita padha mbaléla, Panjenengané karemuk marga saka piala kita; ganjaran paukuman kang nekakaké karahayon tumrap kita iku kadhawahaké ing Panjenengané, sarta marga saka bilur-biluré kita banjur padha dadi waras. (Yés. 53:4-5).
Mekaten pawartosing sih Rahmat saking Gusti!

U: **Puji sokur konjuk Gusti.**

Salam Tentrem Rahayu

PL: Sumangga kita tanggapi sih rahmat pangapuntening dosa saking Gusti kanthi gesang ingkang sami déné apunten-ingapunteni.

Salam tentrem rahayu. Gusti nunggil ing kita sami.

- *umat sami déné sesalaman kanthi ngucap: “Salam tentrem rahayu”*

KPJ 69. ALLAH MAHAKWASA JUMENENG PAMARTA

- 1) Allah Maha kwsa jumeneng Pamarta,
sèstu gung tresnanya, angruwat dosa.
Salir tyang pracaya lamun tansah setya
luwar sing antaka, mlebet mring swarga.
Reff. : Sung sembah puja konjuk Sang Rama,
kang paring nugraha tentrem raharja.
Sung sembah bekti konjuk mring Gusti,
kang sampun nyawisi kamulyan swargi.

- 2) Rama Mahamirah ngrentahken gung berkah
tyang nandhang sangsara manggih waluya
Saliring pra umat tan kendhat rinimat.
srana peparingnya, nadyan prasaja.
Reff. :

PELADOSANING SABDA

(lenggah)

- a. Pandonga Peladosaning Sabda
- b. Pamaosing Kitab Suci

L1: Waosan I: **Yésaya 50:4-9a)**

L2: Masmur Tanggapan: **Masmur 118:1-2, 19-29 (31 : 9 – 16)**

L3: Waosan II: **Filipi 2:5-11)**

PS: Waosan Injil: **Matéus 21 : 1-11 (27 : 11 – 54)**

Mekaten Injilipun Gusti Yésus Kristus. Ingkang rahayu saben tiyang ingkang mirengaken lan nggatosaken Pangandikanipun Gusti ing gesang saben dintenipun. Hosiana!

U: *(ngidungaken)* **Hosiana, hosiana, hosiana!**

- c. Khotbah: **Jagat Raya Nandhang Prihatos**
- d. Wekdal Ening

Pengakening Pitados Rasuli

(jumeneng)

M2: Sumangga kita sesarengan kaliyan sedaya umatipun Gusti ing mangsa kapengker, sapunika lan ing mangsa ingkang badhé dhateng, kanthi ngèngeti sih katresnanipun Allah Rama, Putra lan Roh Suci, kita télakaken iman kita miturut Pengakening Iman Rasuli...

Pandongga Syafaat

(lenggah)

PS: (Kaladosaken déning Pelados Sabda)

PISUNGSUNG

M3: Sumangga kita wujudaken pratélaning sokur kita lumantar atur pisungsung. Pangandika ingkang nalesi pisungsung punika, kapethik saking Masmur 116:12-14 “Kang dakgawé piwales apa marang Sang Yéhuwah, tumrap ing sakèhé sih-kadarmané marang aku? Aku arep njunjung tuwunging pangentasan lan arep nyebut asmaning Pangéran Yéhuwah, arep ngluwari kaulku marang Sang Yéhuwah ana ing ngarepé umat kabèh.”

KPJ 156. ALON SANG SURYA GUMIWANG

1) Alon sang surya gumiwang, candhik-ayu memayu.

Kita antuk pangasoan kanthi tentrem rahayu.

Reff.: Tilingna swara manis ing gentha

pandongga sokur padha aturna.

Hé, gentha, ngumandhanga

dadya sanguning néndra.

2) Sang ratri nglimputi bumi abyor cahyèng kartika

nelahi nyunarken asma Pamarta Gusti kita.

Reff.:

- *Pandongga pisungsung*, kapungkasan sesarengan ngrepèkaken kidung ”Rama Kawula”

PANGUTUSAN

PS.: Minggu Palmarum lan Minggu Sangsara nyathet cancutipun para titah sedaya ing pakaryan kawilujenganipun Sang Kristus.

Sumangga kita pratélakaken sokur kita awit kawilujengan punika lan ugi kanggé sarana njagi Kawilujenganing jagat raya

KPJ 113. GUSTI YÉSUS SANG PAMARTA

- 1) Gusti Yésus Sang Pamarta, kula ndhèrèk Paduka, manggul salib ing salaminya klayan bingahing driya. Kula Paduka kiyatken, sageda tahan sisah sampun ngantos kemuriten, sampun cuwa ing manah.
- 2) Nadyan tinar ing mitra, sinengitan nèng donya, kula manteb ing pracaya, ndhèrèk Gusti slaminya. Lamun Gusti ingkang nganthi, kabegjan kang pinanggya. Lamun Gusti kang ngasihi, mokal yèn ta cilaka.

PS: Eterna manah panjenengan dhumateng Gusti,

U: **kawula ngeneraken manah supados sageda dados abdi ingkang setya.**

PS: Dadosa seksining Sang Kristus.,

U: **kawula sami sumadya ngundhangaken injil, bilih prasetyanipun mesthi tansah jinangkepan.**

PS: Pinujia Gusti,

U: **lumantar gesang kita sedaya, ing ngriki, samangké dumugi ing salaminya.**

P: Tampènana berkahipun Gusti: “Gusti Allah mberkahi panjenengan (kita) lan ngayomi panjenengan (kita). Gusti Allah nyunaraken cahyaning wedananipun dhateng panjenengan (kita) lan maringi sih rahmat. Gusti Allah nungkulaken wedananipun dhateng panjenengan (kita) lan maringi tentrem rahayu. Amin.”

U: NKB 225

Hosiana (5x) Amin (3x)

*(menawi saged, ron palem kasimpen kadadosaken awu kanggé
Dinten Rabu Abu tahun ngajeng)*